

Dithero tsa Tirelano mo Kutlwanong

32/2015 Thero ka moletlo wa Borarobongwe, e le ka 31. 05. 2015

Mo leineng la Modimo o e leng Rara le Morwa le Mowa o o Boitshepo!

Lefoko le le okamelang beke eno, le kwadilwe mo go Jes. 6:3, le re: **"Go boitshepo, go boitshepo, go boitshepo MORENA wa masomosomo; lefatshe lotlhe le tletse kgalalelo ya gagwe."**

1. Sefela sa 162 -145/148

2. Thapelo: Modimo, Mong-wa-thata-yotlhe, o o se nang tshimologo, le e seng bokhutlo, o re abetse bopelotlhomogi jwa go itse kgalalelo ya Borarobongwe jwa gago ka boipolelo jwa tumelo ya nnete, le tirelo ya bongwefela jwa thata ya bogosi jwa gago! Re a kopa, re re: O re bolokele mo tumelong e, o re femele gore re emalalane le tsotlhe tse di fapaanang le yona gore wena, Rara, Morwa, le Mowa o o Boitshepo o tshele, o buse, o le Modimo o le mongwe, jaanong, le ka bosakhutleng. Amen.

3. Lefoko la Testamente e kgologolo le kwadilwe mo go Jes. 6:1-13;

Epistolo ka fa thulaganyong ya 2 e kwadilwe mo go Baroma 11:33-36;

Efangele ka fa thulaganyong ya 3 e kwadilwe mo go Math. 28:16-20.

4. A go ipolelwe tumelo ya bokeresete!

5. Sefela sa 369 -341/348

6. Thapelo. Tlaya, Mowa o o Boitshepo, o re fe ditsebe tse di utlwang gore re utlwe; o re fe matlho a a bonang bogosi jwa gago! Amen.

7. Efangele ka fa thulaganyong ya 1 e kwadilwe mo go Johane 3:1-15, e re: "Go ne go le motho wa Bafarisai yo o bidiwang Nikotemo, mongwe wa lekgotla la Bajuta. Yoo a tla go Jesu bosigo, a mo raya a re: 'Moruti, re itse gore o moruti yo o tswang kwa Modimong; gonne ga go ope yo o ka dirang ditshupo tse wena o di dirang, fa Modimo o se na nae.' Jesu a mo araba a re: 'Ammaaruri, ammaarui ke go raya ke re: Fa motho a sa tsalwe go tswa godimo, ga a ka ke a lemoga puso ya Modimo.' Nikotemo a mo fetola a re: 'Motho yo o godileng a ka tsalwa

jang? A a ka ba a tsena la bobedi mo mmeleng wa ga mmaagwe, a boa a tsalwa?' Jesu a araba a re: 'Ammaaruri, ammaaruri ke go raya ke re: Fa motho a sa tsalwe ka metsi le Mowa, ga a ka ke a tsena mo pusong ya Modimo. Se se tsetsweng ke nama, ke nama; mme se se tsetsweng ke Mowa, ke mowa. O se gakgamale, fa ke go reile ka re: Lo tshwanetse go tsalwa go tswa godimo. Phefo e fokela kwa e ratang teng, o utlwa mosumo wa yona, mme ga o itse kwa e tswang teng le kwa e yang teng. Mongwe le mongwe yo o tsetsweng ke Mowa o ntse jalo.' Nikotemo a mo fetola a re: 'Dilo tse, di ka dirafala jang?' Jesu a mo araba a re: 'O moruti wa Iseraele, mme dilo tse ke eng, fa o sa di tthaloganye? Ammaaruri, ammaaruri ke go raya ke re: Re bolela se re se itseng, re bile re supa se re se bonyeng; mme lona ga lo tshole tshupo ya rona. Fa ke lo boleletse dilo tsa lefatshe, mme lo sa dumele, lo ka dumela jang, fa ke lo bolelela tsa legodimo? Ga go ope yo o kileng a tthatlogela kwa legodimong, fa e se ene yo o fologileng kwa legodimong, e bong Morwa-Motho yo o mo legodimong. Mme Morwa-Motho o tshwanetse go tthatlosiwa, jaaka Moše a kile a tthatlosa noga kwa sekakeng, gore mongwe le mongwe yo o dumelang mo go ene, a se latlhege, mme a nne le botshelo jo bo sa khutleng.'" Amen.

8. Thero: Phuthego e e rategang ya Morena wa rona Jesu Keresete, Nikotemo ke yo! Ke Rabi tokololo ya khuduthamaga ya Bajuda, ya baeteledi-pele ba morafe wa Bajuda. Nikotemu ke Rabi yo o nang le tthaloganyo. O tlotla Jesu, a mmita Rabi. O tthoafetse. Ga a na lenanetema le le fitlhegileng, ga a fitlhi maikaelelo a gagwe. O tla mo go Jesu bosigo gore a bue le ene gore ba se ka ba tshwenngwa ke go tthodielwa ka fa go ka diragalang ka teng mo ntlong motshegare. Go na le ba ba reng a ya mo go Jesu bosigo gore ba bangwe ba khuduthamaga ba se ka ba mmona.

Nikotemo o tlotla Jesu ka go mmaka, a mo raya a re: "Moruti, re itse gore o moruti yo o tswang kwa Modimong; gonne ga go ope yo o ka dirang ditshupo tse wena o di dirang, fa Modimo o se na nae." Ke gore o amogetse, fa Jesu e le moruti yo o tllileng a tswa mo Modimong ka go bona gore o dirile dikgakgamatso tse dikgolo. Re bona monna mongwe yo o tlang go Jesu gore Rabi mongwe a buisane le Rabi yo mongwe ka ga puso ya Modimo. O ka re o ne a re: Ke itse Modimo, le wena o itse Modimo, a re buisaneng gore re kgone go bona boammaaruri. Le fa go ntse jalo, re ka re: Jesu o ne a sa leke go utlwa pele gore Nikotemu o batlang mo go ene, gongwe o ikaelelang ka go bua le ene. Kana Jesu o ne a itse se se mo tshwenyang tota. Ke gona a mmolelelang se se tthokegang bogolo. Jesu ga a rate puisanyo e

e ikaelelang gore go lekanngwe kakanyo ka kakanyo e nngwe, gore go kgethwe fa gare ga tsona ka fa batho ba atlholang ka teng, gonne ene ke ene yo e leng boammaari ka nosi, o itse se se tlokegang tota gore Niketemo a bone thuso tota gore motho a tsalwe sešwa, a mmolelela a re: "Ammaaruri, ammaarui ke go raya ke re: Fa motho a sa tsalwe go tswa godimo, ga a ka ke a lemoga puso ya Modimo." Nikotemo o ne a sa tlhaloganye se Jesu a se arabileng. Ka moo a botsa, a re: "Motho yo o godileng a ka tsalwa jang? A a ka ba a tsena la bobedi mo mmeleng wa ga mmaagwe, a boa a tsalwa?" Nikotemo o ne a sa tlhaloganye gore Jesu o bua ka ga botsalo jo bošwa jo bo ntseng jang. O ne a itse go tsalwa ka fa tlwaelong ka fa tlhagong ya batho, gongwe ka fa tlwaelong ya diphologolo.

Jesu a tshwaya gore o bua ka ga mofuta o mongwe wa go tsalwa, a bua ka ga botsalo jo bošwa jo bo tswang mo legodimong, go tsalwa ka metsi le ka Mowa, a re: "Ammaaruri, ammaaruri ke go raya ke re: Fa motho a sa tsalwe ka metsi le Mowa, ga a ka ke a tsena mo pusong ya Modimo." Dipolelo tse pedi tseo go tsalwa ka botsalo jo bo tswang kwa godimo, le go tsalwa ka metsi le Mowa, di tsamaelana, di raya se le sengwe fela. Yo o iseng a tsalwe ka botsalo jo bo tswang kwa godimo, yo o iseng a tsalwe sešwa ka metsi le ka Mowa o paletswe, ga go diragele gore a bone puso ya Modimo, gongwe go tsena mo go yona. Go itse tseo tse dintšhwa ke kitso e e siameng, gonne re senolelwa fano ka fa re tsenang ka teng mo pusong ya legodimo, go bona puso ya Modimo. Ke se se gakgamatsang. Botsalo jo bo ntseng jalo jo bošwa bo dira motho gore e nne motho yo mošwa. Jesu o phadisanya tsoopedi tseo ka go utlwala le go tlhaloganngwa sentle gore tlhago ya botsalo jwa tlwaelo, le ya botsalo jo bošwa di diragala jang, a re: "Se se tsetsweng ke nama, ke nama; mme se se tsetsweng ke Mowa, ke mowa." Motho mongwe le mongwe yo o tsetsweng ke batsadi ba gagwe ba e leng batho, mmele wa gagwe, mowa wa gagwe, ke tsa nama. Mme motho mongwe le mongwe yo o tsetsweng ka metsi le ka Mowa ke wa Mowa.

Paulo o kwadile, a re: Ka botsalo jo bošwa motho ke yo mošwa, ke sebopiwa se sešwa, 2 Bakor. 5:17. Botsalo jo bošwa ke tiro ya Mowa o o Boitshepo. Motho ka fa tlhagong ya gagwe ga o ka ke o tsena mo pusong ya ga Jesu ka go ikatlholela fela gore o rata go tsena mo go yona ka thato ya gago, gape o tla palelwa fela go tsena teng ka go ipaakanyetsa manno mo go yona ka ditiro tsa gago, gongwe ka se sengwe sa gago. Mo go Joh. 1:13 go kwadilwe go re: Bana ba Modimo ga ba a ka ba tsalwa ka madi, gongwe ka thato ya nama, gongwe ka thato ya monna, mme ba tsalwa ke Modimo. Botsalo jo bošwa bo ntshitswe mo diatleng tsa

gago, le mo thateng ya gago, gonne ke Modimo o o go direlang gore o tsalwe sešwa. Ke sona se se bolelwang ka ga botsalo se se tlhalosang kgang eo, gonne ga go na ope yo o ka itsalang. Ke kitso e e siameng thata, gonne tsotlhe tse di dirang ke Modimo ke tsa nnete, ke tsona tse e leng tsona tota, ke tse di diragalang gore re nne re ikanye tse di dirwang ke ona. Ke gona ka moo go sa tlhokegeng gore kolobetso e boelelwe, le e seng ka gope. E tla nna e na le thata ka metlha. Go a diragala gore o latlhe boswa jwa gago mo gae. Go a diragala gore o tlogele bagaeno, o kgaogane le bone fela, o kgarakgatsege fela mo sekakeng, mme o a itse gore batsadi ba gago, le bomorwa-rrago, le bokgaitradio ba ntse mo gae, ba tlhologelelwa ke wena, ba eletsa, ba go letela gore o boele gae, ba go amogele ka boitumelo jo bogolo, fa o bowa, le fa o ka busediwa teng ka go bolawa ke tlala fela kwa o kgarakgatsegileng teng. Go ntse fela jalo ka go sa dumele tse re di baakanyeditsweng ka kolobetso ya rona, go a diragala gore o latlhegelwe ke manno a gago mo botshelong jo bo sa khutleng, mme o itse, o nne o gopole gore Modimo o ntse o go letetse, ee, o go solofeditse ka setshwantsho sa ga morwa yo o kileng a latlhega gore Modimo Rara o go letetse, bogolo go a diragala, fa a sa ntse a go tlhokomela ka go go gopotsa ka tse a di go solofeditse mo kolobetsong gore o boele gae mo phuthegong. Modimo o a re tlhokomela, o re sala morago ka bopelotlhomogi jwa ona gore re gopodiwe gore tota-tota rotlhe, le wena re bana ba ona, re kolobeditse mo leineng la ona.

A re boeleng mo go Nikotemo! Jesu o ne a mo raya, a re: "O se gakgamale, fa ke go reile ka re: Lo tshwanetse go tsalwa go tswa godimo." A gatelela botsalo jwa go tswa godimo, gongwe botsalo jo bošwa, a re: Le lona Baruti ba Iseraele, lona Bafarisai lo tshwanetse go tsalwa sešwa, le lona lotlhe ba lo ikayang basiami, gongwe ba lo gopolang gore ga lo tlhoke ga kolobediwa, utlwang lotlhe gore botsalo jo bošwa ke se se tshwanetseng go diragala le mo go lona, fa lo ise lo tsalwe sešwa ka metsi le ka Mowa. Tota-tota le Bafarisai ba ba neng ba ikaya gore ba itse Modimo, le ditiragalo tse di kwadilweng mo Testamenteng e kgologolo, le go ipoka, fa e le bana ba ga Aborahama. Jesu a re: Ke se se tshwanetseng go diragala, gore motho mongwe le mongwe a tsalwe sešwa. Nikotemo a botsa potso e e tlwaelegileng, a botsa a re: "Motho yo o godileng a ka tsalwa jang? A a ka ba a tsena la bobedi mo mmeleng wa ga mmaagwe, a boa a tsalwa?" O ne a sa itse karabo. Jesu a mo raya, a re: "O moruti wa Iseraele, mme dilo tse ke eng, fa o sa di tlhaloganye? Ammaaruri, ammaaruri ke go raya ke re: Re bolela se re se itseng, re bile re supa se re se bonyeng; mme lona ga lo tshole tshupo ya rona." Jesu o a reng? A o raya ba ba buang ba e leng basupi ba tse ba di bonyeng?

Mo go Joh. 1:33-34 re utlwa Johane Mokolobetsi, a raya bautlwi ba gagwe a re: "Le nna ke ne ke sa mo lemoge; mme ene yo o nthomileng go kolobetsa ka metsi a nthaya a re: 'Ene yo o tla bonang Mowa o fologela go ene, o nna mo go ene, ke ene yo o kolobetsang ka Mowa o o Boitshepo.' Ke bonye, ka ba ka supa gore yo ke Morwa Modimo." Ga diragala mo kolobetsong ya ga Jesu. Ke sona se se sa amogelweng ke Bafarisai, ke raya kolobetso ya ga Johane e a kolobeditseng ka yona, ba ne ba sa lemoge, fa a ne a tswa mo Modimong. Fela jalo ba ne ba sa amogele Kolobetso ya ga Jesu. Jesu ga a ka a bolelela Nikotemo gore o a senola, le go supa gore Jesu ke mang. Jesu o ne a bua ka ga ditiro tsa gagwe. Re a itse gore ke kolobetso e e leng mosupi wa Morwa Motho, fa e le Mesia yo o solofeditsweng.

Yo o neng a gana go amogela bopaki ka ga kolobetso ya ga Johane, ene yoo gape ga a amogele le e seng bopaki ka ga kolobetso ya ga Jesu, o latola le tsotlhe tse Jesu a di rometsweng, ba sa amogele, fa a rometswe go pholosa batho ba lefatshe lotlhe gore ba amogelwe go nna bana ba Modimo ka go kolobediwa. Mo baneng go botlhofo go amogela kabelo eo bogolo gore Nikotemo a e amogele, gonne Nikotemo o ne a setse a latetse dikakanyo tsa timetso ka ga Modimo le puso ya ona ka ntlha ya botlhale jwa gagwe. Ke se se dirang gore Jesu a bee Nikotemo mo dinaong gore a eme a akanye ka ga lefoko le le builweng la gagwe, a m\mmontshe gore ga a ise a itse sepe sa boammaaruri jwa puso ya Modimo. O ne a ise a itse Modimo, le fa a gopotse gore o mo itse tota. O ne a ise a tlhaloganye gore ka go goroga ga Keresete go gorogile puso ya Modimo, a bona mmele wa ga Keresete, mme o ne a sa tlhaloganye gore tota-tota ene ke mang. O ne a sa ntse a itshwarelela mo timetsong e e fifatsang ditsholofetso tsa Testamente e kgologolo. Ka go tsamaya ga nako, re a utlwa gore o ne a fetoga. (Bona mo go Joh. 7:50-53, le mo go Joh. 19:39-42)

Go sa ntse go le se le sengwe se re tshwanetseng go se tlhokomela mo bokhutlong. Mo go Joh 1:12 go kwadilwe gore "le gale, botlhe ba ba neng ba mo tshola, **a ba naya tshiamelo ya go nna bana ba Modimo**, e bong ba ba dumelang mo leineng la gagwe."

Fano o bua ka ga go nna bana. Mafoko ao a tshegetsa boammaaruri jo bo reng: Re bana ba Modimo. Re bone ba e leng bone. Ke gore re tswelela go gola jaaka mosimane yo o golang go nna monna, gape monna o gola go nna monna yo mogolo, le go nna yo o tsofetseng. Kolobetso ga e khutle mo letsatsing le re kolobediwang ka lona, mme ka kolobetso re beilwe mo tseleng ya go bolaya Atame yo mogologolo gore motho yo mošwa a nne a tsoge ka metlha, re golele mo kitsong ya go itse thato ya Modimo, le mo go saleng Jesu morago, go

apolwe diaparo tsa bogologolo tsa motho yo mogologolo, tsa ga Atame yo mogologolo, motho yo mošwa a kgabiswe sešwa ka tshiamo ka go itshwarelwa thata ka malatsi otlhe mmogo le badumedi botlhe. Ka metlha go a tlokega gore re gopodiwe gore re bana ba Modimo gore re tswelele go tsamaya le go tshela jaaka bana ba Modimo. Go a batlega gore re utlwe, re gopole Efangele ka letsatsi le letsatsi, re tswelele go rata ditaolo tsa Modimo, le ditshisabopelotlhomogi, re atamele gantsi mo boipobolong, le go amogela mmele le madi a ga Keresete, re nne re kaelwe go utlwa gore re tshwanetse go rapela, go tumisa, le go leboga Modimo ka ntlha ya dineo tsa ona ka ntlha ya go re baakanyetsa dikabelo tse di kalo ka bopelotlhomogi.

Kolobetso ke tshimologo ya botshelo jo bošwa fa pele ga Modimo, le go nna mo pusong ya ga Keresete, re mo direle ka metlha ka tshiamo le ka boitshepo. Kana re na le Morena yo mošwa, re golotswe mo thateng ya ga Satane, re nne re kopane le Keresete, re kgaogane le tsotlhe tsa boleo, tsa ga Satane. Fela jalo botshelo ke jo bo mo letlhakoreng la Mofenyi wa boleo, loso, le Satane. Mofenyi yoo o a re tshegetsatsa, o re baya mo dinaong gape, e tla re re sena go wela mo logageng lwa boleo, o tla re ntsha teng ka go re sikara mo magatleng a gagwe go re busetsa gae ka go itshekisa digakolodi tsa rona tse di kgotlelegetsweng gore re bewa fa pele ga Rara yo o mo legodimong re apesitswe ka tshiamo ya ga Morwa Modimo. Mopholosi wa rona o rata go re tihomamisetsa mo tsholofelong eo ka go re senolela ka metlha sešwa gore re na le Rara mo legodimong yo o re ratang mo go kalo, yo o sa rateng gore re latlhege, mme re nne le botshelo jo bo sa khutleng. Ka moo a re emeng ka dinao, re nnele ruri mo tumelong, le mo thapelong ya go tumisa Modimo o e leng Rara le Morwa le Mowa o o Boitshepo, Motlhodi, Mopholosi, Moitshepisi wa rona. Amen.

9. Thapelo: "Mme ona o o nonofileng go dira bogolo go feta tsotlhe tse re ka di kopang le tse re ka di gopolang ka fa thateng e e dirang mo go rona. A kgalalelo e nne ya ona mo phuthegong le mo go Keresete Jesu go ya tshikatshikeng tsa bosakhutleng. Amen." Baef. 3:20-21. Thapelo ya Morena: Rara wa rona yo o mo legodimong ...

10. Sefela sa 370 - 342/349 A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke K. H. Schnackenberg, ka ngwaga wa 2015.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.